

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. रामबन जिले च ल्हास-पस्सियां पौने ते बद्दल फटने ज्नेई क्रोपिएं दी मारै हेठ आए दे इलाकें च राहत ते बचाऽ अभियान अज्ज उप्परोतली दुए रोज बी जारी न।
2. उपमुख्यमंत्री सुरिंदर चौधरी होरें बद्दल फटने करी प्रभावत होए दे रामबन दे इलाकें दा दौरा लाइयै सोगी परोआरें कन्नै दुक्ख जताया ते उनें'गी सरकार दी तरफा हर मुमकन मदाद दा जकीन दोआया ऐ।
3. कृषि मंत्री जोवद अहमद डार होरें राई-बाई ते बागवानी मैह्कमें गी आखेआ ऐ जे ओह् हाल दिएं बरखें ते ऐन-गड़े करी होए दे नुक्सान दा आंकलन करन। उ'नें करसानें गी जकीन दोआया ऐ जे सरकार उ'नेंगी पूरी-पूरी मदाद देग।
4. शिक्षा मंत्री सकीना इत्तू होरें समग्र शिक्षा दी कारकारकदगी दा जायजा लैंदे होई आखेआ ऐ जे सरकार दा मकसद इस गल्लै गी जकीनी बनाना ऐ जे कोई बी बच्चा पिच्छे नेई रेई जा।
5. खराब मौसम दे मद्देनजर अज्ज रामबन ते डोडा जिलें च सभ्भनें स्कूलें ते शिक्षा इदारें गी बंद रक्खेआ गेदा ऐ। मौसम विभाग नै जम्मू-कश्मीर च टामीं-टामीं थाहरें लेई मौसम सरबधी ऑलेज अलर्ट आहली चेतावनी जारी कीती ऐ।

<><><><><><>

Ramban Rescue

बद्दल फटने ते पस्सियां पौने करी प्रभावत रामबन जिले च राहत ते बचाह् कारवाई अज्ज बडलै परतियै शुरू करी दित्ती गेदी ऐ। भारी बरखा, तूफान, ऐन गड़ा ते चानचक्क आए दे हाड़ें करी रामबन जिले च बड़ी मती तबाही मची ते बड्डे पैमाने पर नुक्सान होआ ऐ। त्रऊं न्याणें सनें त्रै जनें दी मौत होई गई ऐ जिसलै दे सैंकड़ा बद्धे लोकें गी सुरक्षत बचाई बी लैता गेआ ऐ। जिला विकास कमीशनर बसील-उल-हक चौधरी हुंदी अगुवाई च जिला प्रशासन हालात पर नेड़मी तक्क रखै करदा ऐ जिसलै जे पुलस, फौज, एसडीआरएफ, एनडीआरएफ ते तुरत कारवाई आलिएं टीमें दे इलावा केइं गैर सरकारी संगठन बी बचाह् कारवाई च रुज्जे दे न।

<><><><><><>

Army Assistance

भारतीय फौज बी प्रभावत लोकें गी जरूरी मनुक्खी सहायता उपलब्ध करा करदी ऐ जेहड़े खराब मौसम दे चलदे बत्ते फसे दे न। फौज उनें रूट्टी, पानी दोआइयां ते होर जरूरी चीजां उपलब्ध करोआ करदी ऐ। फौजी जवान ते अफसर लोकें कन्नै मिला करदे न ते गल्लबात करियै उनेंगी इस ओक्खी घड़ी च सहारा देइयै उंदा हौंसला बधाह् करदे न.

तोआई प्रधानमंत्री हुंदे दफ्तरे च राज्यमंत्री डॉ. जितेन्द्र सिंह होरें तुरत कारवाई करने च फौज दी भूमका दी सराहना कीती ऐ जेहड़े रस्ता बंद होने दे कारण फसे पेदे लोकें गी हर जरूरी समेयान उपलब्ध करा करदे न।

<><><><><><>

Dy.CM Ramban

उपमुख्यमंत्री सुरिन्दर चौधरी होरें जंदे रोज रामबन जिले च बददल फटने आली घटना च त्रऊं जनें दी मौत गी इ कमंदे भागें आली गल्ल दस्सदे होई सोगी परोआरें गी हर चाल्ली दी मदद ते सैहयोग दा भरोसा दोआया ऐ। प्रभावत इलाकें दे अपने दौरे दरान उनें प्रभावत लोकें कन्नै गल्लबात कीती ते जमीनी हालात दा जायजा बी लैता। उनें सरबंधत अधिकारिएं गी राहत ते पुर्नबहाली दे कम्में च तेजी आहन्नने पर जोर दित्ता।

<><><><><><>

Poonch Advisory

पुंछ च बी कल भारी बरखा ते ऐन पौने कारण आम जनजीवन प्रभावत होई गेआ ऐ ते रामबन दी घटना दे बाद लोकें अंदर डरै दी भावना बी पैदा होई गेदी ऐ। एहदे पर पुलसै लोकें गी नेई घाब्रने दी सलाह दिंदे होई आखेआ ऐ जे ओह् घरै अंदर रौहने गी तरजीह् देन ते बाहर खामखा दी टोराफिरी कोला बचन।

स्थिति दा आंकलन करने ते कुसै बी अपातस्थिति च तुरत कारवाई लेई विशेष टीमां बी तैआर रखियां गेदियां न।

<><><><><><>

Dar-Farmers Loss

राई—बाई ते ग्रामीण विकास मंत्री जावेद अहमद डार होरें जम्मू कश्मीर दे बक्ख—बक्ख हिस्सें च हाल च पेदी बरखा, ऐन गड़ा ते अंधी झक्खड़ कारण फसलें ते बाग बगीचें गी पुज्जे दे नुकसान पर चिंता प्रगट करदे होई

राई-बाई ते बागवानी मैहकमे गी निर्देश जारी कीता ऐ जे ओ जिला प्रशासन कन्नै मिलियै पूरे नुकसान दा जायजा लैन ते एह मूल्याकन करन, तां जे प्रभावतें गी बेल्ले सिर राहत ते मदद सरकार पाससेआ थोई सकै। उनें आखेआ जे उमर अब्दुल्ला हुंदी अगुवाई च प्रशासन पूरी चाल्ली करसानें बागवानें कन्नै इस ओक्खी घड़ी च खड़ोते दा ऐ।

<><><><><><>

Itoo Education

शिक्षा मंत्री सकीना इत्तू होरें समग्र शिक्षा दी कारकरदगी दा जायजा लैने गितै कल इक बैठक लाई ते परियोजनाएं गी बेल्ले सिर सबूरा करने, रपे-पैसे गी उचित ढंगै सिर इस्तेमाल च आहनने ते टेंडर कड्डने दी प्रक्रिया च पारदर्शिता दी जरूरतै पर जोर दित्ता। मंत्री होरें ब्लैक-लिस्ट कीती गेदी एजेंसिएं गी परतियै कम्म नेई देने दे निर्देश जारी कीते ते कुड़िएं, दिव्यांग बच्चें ते जनजाती समुदास दे बच्चें सने सभ्मनं लेई समग्र शिक्षा दी जरूरतै पर जोर पाया। बैठक दरान उ'नें आखेआ जे सरकार दा मकसद इस गल्लै गी जकीनी बनाना ऐ जे कोई बी बच्चा, पिच्छे नेई रेई जा। इत्तू होरें बक्ख-बक्ख मैहकमें मझाटै तालमेल ते इक निगरान कमेटी खडेरने दा हुक्म बी रसाल कीता। मगरा उ'नें विद्या समीक्षा केन्द्र दा निरीक्षण कीता ते स्कूली ढांचे च सुधार लेई एह्दे असरदार ढंगै सिर इस्तेमाल दे निर्देश दित्ते।

<><><><><><>

IGP Akhnoor Visit

इक बड्डे सुरक्षा जायजे दे तैहत जम्मू जोन दे आईजीपी भीम सेन टूटी होरें जम्मू-सांबा-कठुआ रेंज दे डीआईजी शिव कुमार शर्मा हुंदे कन्नै अखनूर सैक्टर दा दौरा लाइयै बन्ने आहले इलाकें च सुरक्षा सरबंधी तैयारिएं दी परख कीती। इस मौके उपपर जम्मू-कश्मीर पुलस ते सीमा सुरक्षा बल दे वरिष्ठ अधिकारी बी उ'दे कन्नै हे। आईजीपी होरें ग्राम रक्षा समूहें गी सशक्त बनाने ते बीएसएफ दे कन्नै सांझी सिखलाई दी जरूरतै पर जोर पाया। आईजीपी होरें खित्ते च सभ्मनं सुरक्षाबलें बश्कार तालमेल बधाने लेई आखेआ तांजे आतंकवादिएं दी घुसपैठ आहले रस्तें उपपर बेहतर निगरानी रक्खी जाई सकै।

<><><><><><>

Schools Closed

मौसम विभाग आस्सेआ जारी चेतावनी गी ध्यानै च रखदे होई प्रशासन नै रामबन ते डोडा जिलें च अज्ज संगारे 21 अप्रैल गी सब्बै सरकारी ते प्राइवेट स्कूल बंद रखने दा फैसला लैता ऐ। एहतियात दे तौरा पर लैते गेदे इस फैसले दे कन्नो कन्नी इनें दौनें जिलें दे प्रशासनं लोकें गी घरें अंदर गै रौहने दी सलाह दित्ती ऐ ते

आखेआ जे बड़ी मती मजबूरी जां टाली नेई जाई सकने आले हालात च गै बाहर निकलने लेई आखेआ ऐ। मौसम विभाग नै अज्ज बी जम्मू कश्मीर दे केई इलाकें च मौसम खराब रौहने दे आसार दस्से दे न ते किश टांवी टांवी थाहरें तेज अंधी झक्खड़ झुल्लने, तूफान औने बिजली पौने ते बद्दल फटने जनेए घटनाएं दी बी शैंका जतांदे होई ओरेंज अजर्ट जारी कीते दा ऐ।

<><><><><><>

Highway Update

जम्मू—श्रीनगर राष्ट्री जरनैली सिड़क एनएच 44, रामबन जिले च केई थाहरें पर ल्हास—परिसियां पौने करी अजें बी गड़िडएं दी आओजाई लेई बंद ऐ। राष्ट्री जरनैली सिड़कें सरबंधी भारती प्राधिकरण — एन.एच.ए.आई. दे प्रोजेक्ट डरैक्टर पुरुषोत्तम कुमार होरें आकाशवाणी समाचार गी दस्सेआ ऐ जे सिड़कै गी ब्हाल करने च घट्टोघट्ट 1 हफते दा समें लगगी सकदा ऐ कीजे फ्हाड़ें परा हेठ आए दा मलबा 10 किलेमीटर दे इलाके च फैले दा ऐ। ट्रैफिक पुलस दे अधिकारिएं दस्सेआ ऐ जे हौली मोटर गड़िडएं गी अज्ज बड्डलै 10 बजे थमां शोपियां आहली बक्खी दा मुगल रोड दे रस्तेया रजौरी—पुंछ जाने दी खुल्ल दित्ती जाह्ग। उ'आं जम्मू—श्रीनगर राष्ट्री जरनैली सिड़क दी स्थिति दा सुधार होई जाने तगर फिलहाल उत्थे गड़िडएं दी आओजाई बंद गै रक्खी जाह्ग।

<><><><><><>